

TUTÚ CÚÚ ÒÚ NÍ CADÚHA TÉ PĀBLÚ QUÍHÍⁿ NDAHA ÑÁYIU ÑUÚ TESÀLÓNICÁ

Té Pāblú ndihi cue tée cùndihi-dé cadúha-güedé tutú quíhíⁿ ndaha ñáyiú xñdecu ichi Xítóhó Jesucrístú ndécú ñúú Tesàlónicá

1 ¹Yúhú té Pāblú cadúha-í tutú-a ndihi té Sílvanú, ndihi té Timùteú cuendá daquixi-í ndaha nchòhó ñáyiú ndècu ndihi-ndí ichi Xítóhó Jesucrístú ndécú ñúú Tesàlónicá, chi tnàhá tnúhu-ndo ndìhi Tátá-ó Dütú Ndiöxí, ndihi Xítóhó Jesucrístú. ²Te xicáⁿ táhú-ndí núú Dütú Ndiöxí, ndihi núú Xítóhó Jesucrístú sá ná chìndee chitúú ñaha-gá xii-ndo, te ducaⁿ ndì nduú-gá ná cádá te ío váha cuu iní-ndó cùndecu-ndo.

Yá Ndiöxí cada ndáá-gá cuéchi nchaa ñáyiú ndècu ichi cuehé ichi duha na sàá nduu quixi tucu Xítóhó Jesucrístú

³Te nchòhó ñáyiú ndècu ndihi-ndí ichi Xítóhó Jesucrístú, càchí tnúhu-í xii-ndo sã cúnàha-ndo sá ñà túú dàña ndee-ndí ndacáⁿ táhú-ndí núú Yá Ndiöxí cuendá-ndó, chi dacuitíí dùcaⁿ taú-xi cunduu chi ío-gá tá sàndáá iní-ndó-gã cuáháⁿ, te ducaⁿ ùuⁿ-gá tá cùu iní tnáhá-ndó nàcuáa ndècu-ndo ichi Yá Ndiöxí. ⁴Núú xíãⁿ nchúhú ío váha càháⁿ-ndí cuendá-ndó núú nchaa ñáyiú sàndáá iní tnúhu Yá Ndiöxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gã, te ñá túú dàña ndeé-ndó nchìcúⁿ nihnu-ndo ìchi-gá, te quide cahnu-ni iní-ndó cuèi nándi sá yãha-ndo ndècu-ndo ichi-gá. ⁵Te sá dúcáⁿ quide váha-ndo ndècu-ndo xíãⁿ cútnùnì nàcuáa cada ñaha Yá Ndiöxí xii-ndo na sàá nduu, chi nduu táhú-ndó cùndecu-ndo núú táxí tnùnì-gá, te ducaⁿ càda-gá chi cùu-gá Yaá quidé ndáá cuiti. Te vitna ndòho-ndo nacuáa ndíhu ndaha-gã dava-gá ñáyiú.

⁶Te Yá Ndiöxí ío váha ndáá quidé-gã, chi mee-gã nachinaa-gá nchaa sá quidé ñaha ñáyiú cùu úhú iní ñáhá xii-ndo, ⁷te nchoo ñáyiú ndòho cuendá Xítóhó Jesucrístú nucúndecu váha-o na sàá nduu nùu túu-gá andiu, te tnàhá cue espíritú xínú cuèchi núú Yá Ndiöxí cuuⁿ ndihi-gá, te cue espíritú-áⁿ quidé-xí nchaa núú chiuⁿ tahu-gá. Te òré nuu túu-gá andiu ndìhi cue espíritú-áⁿ, te ío dàtásaⁿ-xi andiu. ⁸Te dandòho-gá nchaa ñáyiú ñá túú tnàhá tnúhu ndihi Yá Ndiöxí, ñáyiú ñá túú sàndáá iní tnúhu Xítóhó

Jesucristú tnúhu sá cãháⁿ nãcuáa naníhí tãhú-yu. ⁹Te nchaa ñáyiu-áⁿ ïo dandòho ñaha-gá xií-yu, chi ndohó-yu ni caa ni quíhíⁿ, te vá cundécú-yu núú ïo váha càa ndecu-gá táxí tnùnigá. ¹⁰Te ducaⁿ càda ñaha-gá xií-yu na sàá nduu, te dàvá-áⁿ ïo cada càhnu ñaha nchaa ñáyiu sàndáá iní ñáhá xii-gá. Te tnàhá nchaa nchòhó ñáyiu ní sàndáá iní tnúhu ní cãháⁿ-ndí ducaⁿ càda-ndo, te nchaa-o ïo cuñúhu-o-gã dàvá-áⁿ.

¹¹Te cuendá xíãⁿ nõu ïo xicáⁿ táhú-ndí núú Dütú Ndiõxí sá ná chindee ñaha-gá xii-ndo cundecu váha-ndo ìchi-gá dàtná cuiní mée-gã cundecu nchaa ñáyiu ní cãháⁿ-gá cundecu ndihigá. Te xicáⁿ táhú tucu-ndí núú-gã sá ïo na chindee ñaha-gá xii-ndo càda-ndo nchaa sá vãha sàni iní-ndó, ndihí cuendá chiúⁿ quide-ndo cuendá-gá, te ducaⁿ chi sàndáá iní-ndó-gã. ¹²Te núu ducaⁿ na càda-ndo, te cãháⁿ váha ñáyiu cuendá Xítóhó Jesucristú, te tnàhá-ni nchòhó cãháⁿ váha-yu cuendá-ndó, chi mee Yã Ndiõxí ndihí Xítóhó Jesucristú cundàhú iní ñáhá-gã chíndèe ñaha-gá xii-ndo.

Tée quixi dandàhú ñáyiu

2 ¹Te nchòhó ñáyiu ndècu ndihí-ndí ichi Xítóhó Jesucristú càchí tnúhu-ndí xii-ndo nãcuáa cada-xi nduu na quixi tucu-gá, chi quixi-gá nacuaca ñaha-gã xii-o, núu xíãⁿ cãháⁿ-ndí dóho-ndo. ²Te ñá díú sã ííⁿ tnúhu tecú dóho-ndo te ngúíta-ndo càni ííⁿ caní úú iní-ndó, te ni vã yùhú-ndó te núu véxi ííⁿ tée càchí-dé sá cãháⁿ-dé tnúhu Yá Ndiõxí, te càchí-dé sá sà véxi Xítóhó Jesucristú, te vá quèndáá iní-ndó tnúhu cãháⁿ-dé chi ñá ndàá, àdi véxi ííⁿ tée nèhe ííⁿ tutú núú-ndó te càchí-dé sá yùhú ní tendaha-ï véxi, te núu tütú-áⁿ cãháⁿ-xi sá sà véxi Xítóhó Jesucristú, te diu-ni vá quèndáá iní-ndó nãcuáa cãháⁿ-xi, te ndèda-ni càa ñáyiu cãháⁿ-yu dàvá-áⁿ sã sà véxi-gá dico vá quèndáá tnàhí iní-ndó. ³Núu xíãⁿ dátüha ñaha-ï xii-ndo cuendá sá vã dãná tnàhí-ndo mèe-ndo dandahú ñáhá ñáyiu. Chi cùmání-gã sáá nduu quixi tucu Xítóhó Jesucristú, te ngúíta nchaa ñáyiu cuu úhú iní-yu Yá Ndiõxí, te dàvá-áⁿ quiní-yu ííⁿ tée xidó quidé nchàa sá cuèhé sá dúhá, te tée-áⁿ quíhíⁿ-dé núu ùhú núu ndàhú ni caa ni quíhíⁿ. ⁴Te diu-ni tée-áⁿ vã ndèe iní-dé nchaa sá càchí ñáyiu cùu ndiõxí-yu ndihí nchaa dava-gá sá quidé càhnú-yu, te cachí-dé sá ïo cùnuyu-dé, te quíhu-dé ndéé xití veñúhu núu ndécú cuè ñáyiu chihnuhu ñaha xii Yá Ndiõxí coo-dé, te cúñaha-dè xií-yu sá cúú-dè Yã Ndiõxí.

⁵Te dandàcu iní-ndó chi nchaa tnúhu-a sa ní cachí tnúhu-í xii-ndo cùtnàhá ní xindecu ndihí ñaha-ï. ⁶Te nchòhó sa cùtnuní iní-ndó ñã cúú sã ngání ñaha xii tée-áⁿ nõu ñá túú-dè vitna, dico na sàá nduu tàú-xi quee-dé caca cuu-dé te dàvá-áⁿ quiní ñáhá nchàa ñáyiu. ⁷Te ïo titní núú sã cuèhé sá dúhá quide yucu ñávãha dícó-ni sá vãtá quínigá ñáyiu, dico ndècu ííⁿ sá

ñã dáñá càda-xi nchaandi túhú nàcuáa càchí iní-xi, dico sáá nduu xòcuíñí sá ñã dáñá-áⁿ te dàvá-áⁿ cada-xi nchaa nàcuáa càchí iní-xi. ⁸Te sáá nduu quíní-yu téé quide nchaa sá cuèhé sá dúhá-áⁿ ñuyíú-a. Te òré ná quìxi túu Xítóhó Jesucrístú, te mee-ni sã dátãsaⁿ-xi, ndihí yócó yuhu-gá cuú téé-áⁿ. ⁹Te sácuíhná tendaha-xi téé-áⁿ quixi-dé, te cuáñaha-xi tnũhu ndee ìní cada-dé nándi sá cáda-dě. Te cada-dé sá ñã túú tnàhí ndàcu ni ìⁿ ñáyiu ñuyíú-a cadá-yu, dico mee-ni dándahú ñáhá-dě xií-yu caca cuu-dé. ¹⁰Te nchaa núú sã cuèhé sá dúhá càda-dé dandàhú-dé nchaa ñáyiu sa ñũhu ichi cuáháⁿ núú ùhú núú ndàhú, chi ñã túú ní cuíní-yu quindáá iní-yu tnúhu ndáá tnúhu Yá Ndiöxí cuendá naníhí tàhú-yu. ¹¹Te sá dúcáⁿ ñã túú ní cuíní-yu quindáá iní-yu tnúhu ndáá, núú xiãⁿ daña Yã Ndiöxí dacàháⁿ yucu ñãvãha iní-yu quindáá iní-yu nchaa tnúhu ndehnde ¹²cuendá cuíta nihnú-yu, te ducaⁿ yãha-yu chi ñã túú sàndáá iní-yu tnúhu ndáá càháⁿ Yã Ndiöxí, chi mee-ni nchaa sá cuèhé sá dúhá cùdí iní-yu quidé-yu, te cuíta nihnú-yu chi ducaⁿ ñí cachí Yã Ndiöxí cunduu.

Ñáyiu ní cachí Yã Ndiöxí naníhí tàhú

¹³Te nchòhó ñáyiu ndècu ndihí-ndí ichi Xítóhó Jesucrístú, ñáyiu ío cùu iní-gá càchí tnúhu-ndí xii-ndo sã ñã túú dàña ndee-ndí ndàcáⁿ táhú-ndí núú Yã Ndiöxí cuendá-ndó, chi ducaⁿ tàú-xi cunduu, chi Yá Ndiöxí ní cachí-gá ndéé cútnàhá vátá ngãva-gá ñuyíú sã nánihí tàhú-ndó, te diu Espíritú-gá dácàháⁿ-xi iní-ndó ndècu yĩnhu-ndo núú-gã, te sàndáá iní-ndó tnũhu ndáá càháⁿ-gá nõu xiãⁿ ní naníhí tàhú-ndó. ¹⁴Chi cuendá tnàhí-a ní cáháⁿ ñáhá Yã Ndiöxí xii-ndo, te ducaⁿ ñí naníhí tàhú-ndó chi ní sàndáá iní-ndó tnũhu Xítóhó Jesucrístú ní cáháⁿ-ndí núú-ndó, te sáá nduu te cundecu-ndo tnàhá-ndó nõu ìo váha càa ní nduu táhú Xítóhó Jesucrístú ndécú-gã.

¹⁵Núú xiãⁿ nchòhó ñáyiu ndècu ndihí-ndí ichi Xítóhó Jesucrístú ío càháⁿ-ndí dóho-ndo sã và dáñá nihnu-ndo ichi-gá, te ni và nácuànaa-ndo nchaa tnúhu ní cáháⁿ-ndí núú-ndó cùtnàhá ní xindecu ndihí ñaha-ndí xii-ndo, te diu-ni ducaⁿ càda-ndo nchaa tnúhu tëndaha-ndí véxi. ¹⁶⁻¹⁷Te xìcáⁿ táhú-ndí núú-gã sá ná dácàháⁿ-gá iní-ndó cùndecu-ni-ndo ichi-gá, te ducaⁿ ìo na chìndee ñaha-gá xii-ndo cãháⁿ-ndó mée-ni tnúhu váha, te cada váha-ndo cùndecu-ndo nacuáa cuu váha iní-gá, chi mee Dütú Ndiöxí ío cùu iní ñáhá-gã xii-o, te diu-gá ní taxi-gá tnúhu ndee ìní cundecu ndihí-o ñè caa ñí quíhíⁿ, te ní cachí tnúhu tucu-gá ingá tnúhu váha sá cùndètu-o Xítóhó Jesucrístú.

Cáháⁿ ndihí-ndo Yã Ndiöxí cuendá-ndí

3 ¹Te nchòhó ñáyiu ndècu ndihí-ndí ichi Xítóhó Jesucrístú, ndéé núú ndíhí-ñã càchí tnúhu-í xii-ndo sã cãháⁿ ndihí-ndo Yã Ndiöxí

cuendá-ndí cuendá sá ná chindee ñaha-gá xii-ndí, te ducaⁿ ndíhi-ni cuténuu tnúhu Xítoho Jesucristú nchaa xichi, te cudíí iní-yu tnúhu-gá dàtná quidé nchòhó. ²Te cáháⁿ ndíhi tucu-ndo Yă Ndiöxí cuendá sá ná còto ñaha-gá xii-ndí, te ñá túú nă cada ñaha ñăyiu cuihna iní-xi ndècu ichi cuehé ichi duha xii-ndí, chi ñá ncháă-yu sàndáá iní-yu tnúhu-gá. ³Dico Xítoho Jesucristú quidé-gă nchaa sá càháⁿ-gá, te diu-gá cada te nchòhó cundecu-ni-ndo ìchi-gá, te coto ñaha-gă xii-ndo cuendá sá ñà túú nă cada ñaha yùcu ñávăha. ⁴Te Xítoho Jesucristú quidé-gă cútnùní iní-ndí sá nchòhó quidé-ndó nchàa nacuáa ní dánèhé ñáhá-ndí xii-ndo, te diu-ni ducaⁿ càda-ndo cundecu-ndo. ⁵Te xicáⁿ táhú-ndí núú Yă Ndiöxí sá ná chindee ñaha-gá xii-ndo cùu iní-ndó-gă, te diu-ni-gá ná chindee ñaha-gá xii-ndo cùnduu cahnu iní-ndó, chi Xítoho Jesucristú ducaⁿ ïo càhnu iní-gá.

Tàú-ó càda chiuⁿ-o

⁶Te nchòhó ñăyiu ndècu ndíhi-í ichi Xítoho Jesucristú, càháⁿ-í dóho-ndo să méé-gă cuiní-gá sá vă ñihí tnáhá-gă-ndó ndíhi ndéda-ni càa ñăyiu cächí sá sàndáá iní tnúhu-gá, ñăyiu ñá túú cuiní cada chiuⁿ, chi ñăyiu ducaⁿ xiquide ñá túú cuiní-yu tnií-yu tnúhu sá ñí dánèhé ñáhá-ndí xii-ndo. ⁷Te nchòhó sa xìní-ndó nàcuáa cada-ndo cùndecu-ndo canchicúⁿ nihnu-ndo nàcuáa quide-ndí. Te cútnàhá ní xindecu ndíhi ñaha-ndí xii-ndo chi ni ñⁿ nduu ñá túú ní tühío-ndí. ⁸Te ni ñà túú dicó ducaⁿ ni quèheⁿ-ndí sá ndécú ndíhi ñăyiu caxi-ndí àdi canehe-ndí, chi cuèi nduu cuèi niú ío ní quide chiuⁿ-ndí ní ñihí-ndí díhúⁿ ñí saaⁿ-ndí nchaa sá ñí nàndíhi-ndí cuendá sá ñà túú ní cuiní-ndí chichiuⁿ ñaha-ndí xii-ndo. ⁹Te cuèi tàú ndisa-ndí cachí tnúhu-ndí xii-ndo să chíndèe ñaha-ndo xii-ndí ní cùu, dico ní quide chiuⁿ-ndí cuendá ní cuiní-ndí danèhé ñáhá-ndí xii-ndo nàcuáa cada-ndo cùndecu-ndo. ¹⁰Te cútnàhá ní xindecu ndíhi ñaha-ndí xii-ndo ñí cachí-ndí sá ncháá ñăyiu ñá túú cuiní cada chiuⁿ te vă cuăha-ndö-yu sá caxí-yu. ¹¹Te vitna ñihí-ndí tnúhu sá ío dava nchòhó ñá túú tnàhí quide chiuⁿ-ndo, chi àúⁿ nă cuu ndí cuu ndí cuu-ni-ndo núú ndécú dàva-gá tnàha ñăyiu-ndo. ¹²Te yúhú càháⁿ-í dóho nchaa nchòhó ñăyiu ducaⁿ ñà túú cuiní cada chiuⁿ sá cádá chiuⁿ-ndo cuendá ñihí-ndó nchàa sá cóhó să caxí-ndó, te duha càháⁿ-í dóho-ndo, chi ducaⁿ cuiní Xítoho Jesucristú Yaá táxí tnùní ñáhá xii-o cada-ndo, te òré cada chiuⁿ-ndo te vă ïo cada dusaⁿ-ndo.

¹³Te nchòhó ñăyiu ndècu ndíhi-í ichi Xítoho Jesucristú, vă dáñá ndèé-ndó càda-ndo mee-ni sá văha. ¹⁴Te núu ñⁿ ñăyiu ndècu ndíhi-ndo ñá túú cuiní-yu tnií-yu tnúhu càháⁿ-ndí núú tütú-a, te cundehe-ni-ndo nūu ndéda càá-yu, te vă ñihí tnáhá-gă-ndó ndíhi-yu cuendá sá ná cùcahaⁿ núu-yu, ¹⁵dico vă cúú ũhú iní-ndö-yu, chi cáháⁿ-ndó dōho-yu cada-ndo să ndécú-ndó ìchi Xítoho Jesucristú ndíhi-yu.

2 TESALONICENSES 3

Tnúhu ndéé núú nǐ ndihi-ná

16Te mee Xǐtohó Jesucristú ío váha cùu iní-gá ndécú-gă, te xìcáⁿ táhù-í núú-gă sá méé-gă ná cádá te ío váha cuu iní-ndó tnàhá-ndó cùndecu-ndo cuéi nása-gá ná cùndecu-ndo. Te mee-gă ná cùndecu ndihi ñaha-gá xii-ndo nchàa-ndo.

17Te vitna yúhú té Păblú tée-í tnúhu-a quide ndee iní ñáhà-í xii-ndo, te diu-ni duha càa ncha letrá-í ncha núú tütú cáđŭha-í. **18**Te xìcáⁿ táhù-í núú Xǐtohó Jesucristú sá ïo na chindee chitúu ñaha-gă xii-ndo nchàa-ndo. Te ducaⁿ na cùnduu. Te ío chí cádá ndèe iní-nă vitna.